

Nej tsis txhob ntshaw luag vaj luag tsev, luag poj luag sev, luag tubmab tubqhe, luag tsiaj luag txhuv, lossis luag ib yam dabtsi twg hlo li. (Khiavdim 20:1-17)

370

TSIS TXHOB SIB THUAM

Nej tsis txhob liam txim rau lwm tus, Vajtswv thiaj yuav tsis rau txim rau nej,

Rau qhov Vajtswv yuav rau txim rau nej ib yam li nej liam txim rau lwm tus. Nej muab lub luaj li cas luj rau lwm tus lawm, Vajtswv yuav muab lub luaj li ntawd luj rov qab rau nej.

Ua li cas nej yuav ntsia qhov nyuag hmoov ntoo uas nyob hauv nej tus kwvtij lub qhovmuag, tiamsis nej nco tsis txog hais tias, twb muaj ib ya niag ntoo nyob hauv nej lub qhovmuag.

Thaum nej tseem muaj ib ya niag ntoo nyob hauv nej lub qhovmuag, nej tsis txhob hais rau nej tus kwvtij hais tias, yawg, cia kuv pab koj muab qhov nyuag hmoov ntoo uas nyob hauv koj lub qhovmuag tawm. Cov niag neeg siab phem es, nej yuav tsum xub muab yav niag ntoo uas nyob hauv nej lub qhovmuag tawm tso, nej thiaj pomkev muab qhov nyuag hmoov ntoo uas nyob hauv nej tus kwvtij lub qhovmuag tawm tau. (Mathais 7:1-5)

Thaum neeg Leejtub los ua Vajntxwv yuav muaj cov tubtxib saumntuj nrog nws los, nws yuav zaum saum Vajntxwv lub rooj.

Txhua haivneeg hauv qab ntuj no yuav tuaj nyob ua ke ntawm nws xubntiag, nws yuav muab sawvdaws cais ua ob pab ib yam li tus tswv yug yaj muab pab yaj cais tawm ntawm pab tshis.

Nws yuav koj cov neeg uas ua raws li Vajtswv lub siab nyiam los nyob ntawm nws sab xis, thiab koj cov neeg uas tsis ua raws li Vajtswv lub siab nyiam los nyob ntawm nws sab laug.

Nws yuav hais rau cov neeg uas nyob ntawm nws sab xis hais tias, nej cov uas tau kuv Txiv txoj koobhmoov, nej cia li los nyob lub tebchaws uas nws twb npaj cia rau nej puag thaum tsis tau tsim ntuj tsim teb los lawm.

Thaum kuv tshaib plab nej muab mov rau kuv noj. Thaum kuv nqhis dej nej muab dej rau kuv haus. Txawm yog nej tsis paub kuv los, nej tseem hu kuv los so hauv nej tsev.

Thaum kuv tsis muaj tsoostsho hnav, nej muab rau kuv hnav. Thaum kuv muaj mob muaj nkeeg nej tuaj tu kuv. Thaum kuv raug kaw hauv tsev lojcu nej tuaj xyuas kuv.

Thaum cov neeg ncaincees hnov li ntawd lawv yuav teb hais tias, tus Tswv, thaum twg ais peb pom koj tshaib plab peb tau muab mov rau koj noj, lossis pom koj nqhis dej thiab muab dej rau koj haus no?

Thaum twg ais koj tuaj ua qhua peb tau hu koj los so hauv peb tsev, lossis pom koj tsis muaj tsoostsho hnav, thiab peb muab rau koj hnav no?